

Kerbrede 2004

Endlich is grie-weiß Kerb 2004,
die Zimmner sind do un die Neubürger hier,
Heit doun mer uns nit im die Olympiade kimmern,
mer erläwe jetzt es Wunder vun Zimmern.

Donn unsern Höhepunkt im Joahr.
is die Zimmerner Kerb, des is doch kloar.
Un ich de Kerbvadder rufe Gure Ehr Leit,
glei kimmt die Kerbred es werd joa a Zeit.

Ewwer erst die Vorstellung vun uns drei,
als Kerbmädsche heb ich die Suse Kuhr debei,
De Alexander Schüssler schenkt uns oi,
der macht sein Poste als Mundschenk werkllich foi.
und als Kerbvadder doun ich mit Eich oan trinke,
wer mich noch nit kennt ich bin de Sascha Linke.
Unser Kerbbobbe haast Leni und is drunne uff de Roll,
ich glaab sie is schon wirrer roawevoll.
En Grund zum Feiern hot se mit Recht gefunne,
schließlich hotse joa a e Goldmedaillie gewunne.

De Umzug wor schej ich donk de Vereune,
Kerbborschejoahrgäng, alle Zimmerner grouße und Kleune,
es wor toll vun Eich ehr hebt die Leit schon in Stimmung gebracht,
alles strahlt, fraat sich singt un lacht
Un deshalb doun mer erst emol es Kerblied singe,
un donn will ich Eich die Kerbred bringe.

Kapell stimmt ou, mer singe mit,
de Zimmerner Kerbmarsch haast de Hit.

Stichwort König der Löwen, die erst Geschichte,
do kann ich Eich heit wos tolles berichte.
Die Zimmerner Feierwehr im vergangene Joahr,
macht en Ausflug noch Hamburg - ehr Leit - des is woahr.
Des Musical König der Löwen läft dort un is schej,

un do wollte die Zimmerner emol enne gehj.

Wie krieje mer Koarte mer gehjn in's Reisebüro,
do segt en Moann wos en Quatsch noa des mache mer so,
heit werd iwwers Internet souwos reserviert
ich kimmern mich drimm des is ruck zuck bassiert.
Un wahrhaftig es klappt er hot die Koarte bestellt,
Es Internet verbindet halt die ganze Welt.

Un donn wor's souweit de Ausflug wor do,
alles fähjert Richtung Norden, un alles is froh.
De Musical-Owend, die beste Klaarer wern geschnappt,
un perfekt gestylt Richtung Hafe gedappt.
Dort stehjt des Theater - extra gebaut,
wou mer den König der Löwen donn schaut.

Voller Spannung doun die Zimmerner warte,
un all hewwe in de Henn ehr Eutrittskarte.
Ewwer donn der Schock sie kumme nit enne,
wos wolle sie donn do, dut des Personal schenne.
Die Vorstellung in die sie wolle, kenne se nit lese,
is die verig Woch doch schon gewese.
Do wor der Ausflug natirlich gelaafe,
die oalde Koarte kenne se noch nit emol verkaafe.

Un die Moral vun der Geschicht,
entwerrer kann mer des Interenet orrer mer konns nicht.
Un wonn mer Koarte bestellt do soll koaner mucke,
muss mer halt richtig uffs Datum gucke.

Un die Kapell is jetzt dabei,
mim Lied vun de Reeperbahn nachs um halb drei.

Vun Zimmerner, die verraaase fellet mer noch ebbes oi,
und die Story is werklich a gonz foi.
E paar ältere Männer hewwe minoanner iwwer Noacht,

im letze Joahr a en Ausflug gemoacht.

Sie hewwe zu zwatt immer e Stuwwe genumme,
weil Doppelzimmer billiger kumme.

Owends wie se in's Bett sinn han se gor koa Problem,
es hat jeder e bissje getrunke, un do schlofe se schön,

Ewwer mojends beim uffwache hot oaner gedenkt,
sie hen ehm des Kreuz iwwer nocht ausgehenkt.

Er hat Schmerze wie e Dier und wie er steijt uff,
guckt er auf mehrere Bisswunden druff.

Vun uwwe bis unne wor soim Köper blitzeblo un wund,
Debei wor er owends wie er ins Bett is noch kerngesund.

Wos is do lous dut der verbissene Moann erschrecke,
un sofort soim Bettnachbar uffgeregt wecke.

Der macht soi Aa uff, waas gor nit gnaa wou er is,
greift sich on de Mund un segt wou is moi Gebiss.

Er is donn a aus soim Bett gesprunge
un sie hewwe gemeinsam die Suche uffgenumme.

Den Fund vum Gebiss hewwe se gonz schnell gemoacht,
des wor im Kumpel soim Bett un hat den die gonz Noacht
er werds Eich denke un a schon wisse,
on verschiedene Stelle heftig gebisse.

E Lied fällt mer dodezu nit oi,
do singe mer es Kerblied wie kennts oannerst soi.

Golf is werklich der Modesport,
un mer hewwe a en Golfplatz bei uns om Ort.

Un uff dem Groas orrer uff dem Grün,
fährt mer mit Elektroautos her und hin.

E Mädche vun Zimmern hat sich a sou e Auto genumme,
wie se zum speele uff dem Golplatz ougekumme.

Sie fähjert mit dem leise Elektrowoue

guckt sich sou im, un wos soll ich Eich soue,
wie ehrn Blick sou iwwer de Parkplatz gehjt,
wou ehr normal Auto obgestellt stehjt.

Is Se ruckzuck lousgeschosse,
un hot des Elektrowäjelche stehjgelosse,
donn ehr oanner Auto rollt de Buckel awwe,
Sie hots gepackt, konns groad noch schnappe.
Sie springt enne ins Auto, werft sich uff de Sitz,
ziegt die Handbrems ou, des is koan Witz.
es dut wirklich groad sou lange,
koa Bildzeitung wer mej dezwische gange.

Ewwer des wor noch nit alles ehr Zimmerner Leit,
wie die Kloa ehr Auto ouhält in dere Zeit,
dut sich un des is wirklich nit mej zum Lache,
des Elektro-Golf-Wäjelche selbstständig mache.
Un uff des Wäjelche springt es Mädche nit mej rechtzeitig uff,
noa es rollt uff de Mercedes vum Golfplatzbesitzer druff.

Do wor wirklich de Deiwel lous,
un des Gejammer wor riesig grouß,
Golf hot des Mädche on dem Toag nit mej gespeelt,
die Fahrzeuge hann se groad genug gequält.

Apropo Fahrzeuge do felit mer noch e schej Geschichte oi,
von einem Kerbvereinsmitglied soll die soi.
Der Monn speelt Trompete bei de Kerbvereunskapell
un vergonge sunntoags, do wollt der gonz schnell.
Zum Glöckelches-Fest in die Goartestroße,
dort horrer gesollt Trompete blose

Un wie des im Läwe als emol gehjt,
zu moanche Termine is mer oft mol zu spät,
Un on dem Mojend wer der Moann besser gor nit uffgestehje
Donn es sinn dem nor blede Sache geschehje.

Erst muss er drei mol ins Haus wirrer enne,
er hot dauernd wos vergesse un fängt ou zu schenne.
Donn horrer endlich alles, denkt er, wos a Glick,
setzt sich ins Auto un fähjert longsom zurick
Er häjert a Knirsche un komische Geräusche
Un hofft er det sich in dem Fall täusche,
ewwer es wor nit sou, er hats geahnt un befürcht,
wos do hinner dem Auto knirscht.

Soi Trompete hot noch im Houf geleje,
un die harrer beim Rickwärtfoahrn iwverseje,
Die Trompete wor blatt, es wor nix mej mit dere ouzufonge,
un dem oarme Kerl hewwe die Träne in de Aaa gestonne.

Zum Glick dut er noch sou e paar Instrumente soi Eigen nenne,
sunst het er on dem Mojend noch nit emol speele kenne.
Ewwer die wou er iwverfoahrn hot wor gewese soi best Stick,
sou ebbes kriegt der im Läwe nit mej zurick.

Des worn zwaa Autogeschichte Kapell geb jetztl Gas,
un speel uns des Lied: Ich will Spaß

De Bojermeister hat Gebortstoag un wie des sou ist,
denkt er for moi Bier, des ich aussschenke, heb ich en Spezialist,
Ich houle mer groad de Geschäftsfiehrer vun de Kistenwache,
der hot des gelernt und dut die Sach om Beste mache.

Es erste Fass hot der Spezialist in Angriff genumme,
ewwer es is koan Troppe Bier rauskumme.
Der Uffsatz for des Keggy hat nit gedou,
do macht der Bierbrauer en zweite drou,

ewwer a der hot nit funktioniert, gar keine Frage,
mer brauche e richtig Fass mit Zappanlage.
Des Fass wor glei do, ewwer koan Manometer,
un erst annertalb bis zwaa Stunn später,
läft Bier aus dem Fass, Leit ich soags Eich wie's ist,

un sou ebbes nennt sich donn en Spezialist.

Ewver vun dem Moann konnn ich Eich noch ebbes berichte,
horcht emol zu des is a e schej Geschichte.

Letzt owends wor der beim Nico in de Mehrzweckhall
un wie er noachts haom is aus dem bekannte Lokal,
ziegt er soin Jack ou, der dut wie immer iwverm Stuhl dort henke,
ewver der gure Moann dut iwverhaupt nit drou denke.

Dass er ohne Jack wor kumme,
noa er hot sich oufach oan mitgenumme.

Is hoam in's Gleckelche un legt sich in's Bett,
en oannern Gast find des ewver absolut nit nett.

Er rennt im Lokal rim un sucht soin Jack,
do segt de Wirt ich glaab den hot de Beutel der Sack.

Das der Mann soin Jack nit hot, wor joa gor nit sou schlimm,
ewver in de Tasche worn dem soi Hausdeerschlüssel drinn.
Er is hoam un hot geschellt wie en wille, ewver koaner macht uff,
do kimmt er nor uff oan Gedoanke druff.

Ich schloafe im Auto wos will ich donn mache,
glaabts dem oarme Kerl wor gor nit zum lache.

Un de Beutel leit in soim Bettche goanz woarm,
un hot dem oannern soin Jack im Oarm.

Die Kapell speelt dezu wos glaabt ehr wohl,
jetzt des Lied vom Thomas unser aller Idol.

Dut en Zimmerner Urlaub mache,
Ferien, verraaase un laurer sou Sache,
do foahrn die Leit nit ohne Proviant,
dodever sinn mer Zimmerner gut bekonnt.
Es Stick Lewwerworschtbrot, en Pudding orrer a obgekocht Ei,
des hot en richtige Zimmerner debei.

Un wonn die Reise dauert e par Toag orrer Woche,
do konn mer joa sogoar a selber koche.

Sou fähjert a e Gruppe ins Ausland vun Zimmern,
un im de Proviant do doun se sich vorher kimmern.
Sie hann alles im Auto und foahrn in die Welt
mer koche uns selbst, un spoarn unser Geld.

Doch on de Grenz, fraan se sich nit mej iwwer die Sache,
donn die Urlauber doun die Rechnung ohne die Zöllner mache.
In dem oane soim Auto wor nur Fleisch und Worscht,
un in dem oannern worn Getränke for jedem soin Dorscht
un der mit dem Fleisch is de Zollbeamte uffgefalle,
des wor a en Haufe Zeig for die Urlauber alle.

Un mer derf zwar e Friehestückche oifiehrn in e Loand,
ewwer nit en Zentner Fleisch, des is doch bekannt.
Der Zoll hot die Autos ausenoannergenomme,
un natirlich sämliche Lebensmittel gefunne.
E schej Stoange Geld hewwe die Beamte for die Lebensmittel kassiert,
for des Geld wern die Zimmner besser ins beste Hotel ennemarschieret.

Un wos die Kapell jetzt mit uns macht,
sie speelt des Lied vun de Sau, die werd geschlacht.

Des wor's ich kumme jetzt zum Schluß,
ewwer ich heb noch e paar Kloanigkeite die ich soue muß.
Als allererstes des ist kloar,
kimmt de Bojermoaster drou wie alle Joahr.
Vorsjoahr beim Kerbobhaule harrer en Bock geschosse,
un die Kerbborschte die verkehrt Stroße ennegejh losse.
Ich soues noch e mol Bojermoaster bass uff,
Die Bertha von Suttner awwe un die Dieboier eruff.

Donn misst ich es Zimmerner Blätche emol kririsiert,
in Zimmern dut joa veel un a en Haufe bassiern,
ewwer guckt mer in's Blätche wonns im ebbes wichtiges gäjht,
isses entweder zu wenig orrer kimmt de Artikel zu spät.
Ich wünsche mer vum Lokal-Anzeiger bleibt doch e bisssje aktuell,

un veröffentlicht die Sache richtig und vor allem schnell.

Apropo Blätche, uner Verbände und Vereine,
konnt jeder lese grouße Zimmerner und kleine,
schwarz uff weiß des in de Zeitung steht,
in Kloa-Zimmern werd seit fuffzehjnte August nit mej genäht.
Wonn se moane, des is jedem soi Sach, ich doun do nit schenne,
ewwer werim rickt mer sou e Entscheidung in die Zeitung enne?

Gonz zum Schluß noch e bissje Gebrebbel on de Schwarze Bock,
der unsern Kerbborschte-Joahrgong nit in die Roadfoahrhall egeloare
hot.

Frieher worn die Kerbborschte dort immer willkommen,
ich hoffe des werd vun dem Joahrgoang ernst genommen.
Donn Kerbnachwuchs ist wichtig, des dut jeder wisse,
sunst sinn mer kerbmäßig in Zimmern ejendwonn uffgeschmisse.
Un apropo Nachwuchs, do brauche mer in Zimmern immer veel,
deshalb schenke se ehrne Kinn des berühmte Spiel.
Wem ist die Kerb, des sollte jeder kenne,
in en richtige Haushalt in Zimmern gehejert des enne.

Ewwer jetzt kimmt de Hoammer gonz aktuell,
Kerb messt mer jetzt in Dezibell,
uff de Bojermoasterei do schafft en Monn,
der des mireme Gerät gonz prima koann.
Un on Kerbfreitag hot der des ausprowiert
Un is in Zimmern vun Wertschaft zu Wertschaft marschieret,
Wie kann mer donn Stimmung on Kerb iwverhaupt messe,
ich soags Eich des kann mer doch glatt vergesse.
Sou ebbes hot's on Zimmerner Kerb noch nit gewwe,
Der Moann hat Glick, dass sen nit rimgeha hewwe.
Un hoamlich lache un singe, des konns doch nit soi,
es beste ehr packt des Gerät gonz schnell oi.

Jetzt bin ich ewwer fertig ehr Zimmerner Leit,
es werd wie immer for die Nationalhymne Zeit.
Lejgt also uff's Herz die rechte Hand

un singt unser Hymne, die is joa bekannt.
un anschließend in die Mehrzweckhall do kummt ehr doch noch,
die Zimmerner Kerb die läwe